

“Ngaiz Bak Ranz” Dilingz:

Gaeuqgeq Gyaeundeidei Yinx Vunz

美丽古老诱人的地灵侗寨“百家宴”

□ Lungz Cwag ingj Siabyungz boiz



▲ Doq danz bizbaz doq ciengq go, vunz riuho ho sim' angq raeuh.

▲ Lungz foux soengq fuk daengz, caencik baengzyoux hoh.

◀ Foux lungz doxdax daeuj dem angq, diegdangz vunz humx yawj maezmwd.



▲ “Ngaiz bak ranz” raez-rangh, miz gangj miz riu yienh huzndei.



▲ Ngoenzciet lwgmbwk caemh ganj ma, gwnz roen nga-nga vunz doxcaeh.

Lungzswng Gak Cuz Swciyen Lozgyangh Yangh Dilingz Duncgai moix bi liggaeuq ndwenloeg ngeihseiq cungj banh aen hozdung vwnzva fungsug minzcu “ngaiz bak ranz” bi banh baez ndeu, vunzmbanj Duncguz cungj cingj caencik baengzyoux daengz ndaw mbanj caez ciengq go diuq foux, boq venz caijdangz, yawj roeg doxdaj, guh gak cungj gak yiengh vwnz dij hozdung, gak ranz lij dawz gij nohsoemj, bitsoemj, byasoemj ndaw ranz iepguh haenx daengj byaeknoh daegsaek caeuq laeujhaeucid comz daengz henz giuzndojfwn gyaeuj-mbanj, caeuq baengzyoux caencik caemh gwn “ngaiz bak ranz”, gangjgoj yaeng saeh demgiengz doxgiet.

“Ngaiz bak ranz” Dilingz Duncgai dwg daj aen gojriuz gaeuqgeq gyaeundeidei ndeu cienz roengzdaeuj. Riuz naeuz seiz ciuhgeq, rangh dieg Dilingz Duncgai deng iugvaiq raemxrongz guhhaih, doenghnaz couh yaek deng dumh, ranz couh yaek deng dongj doemq, gyoengqvunz couh yaek deng duzgvaig raemxrongz gienj bae, sawqmwh miz boux yinghyungz ndeu daj gwnzmbwn mbin roengzdaeuj, yaengx fajfwngz rengzrwd de raemj gat ndokhwet duzgvaig raemxrongz, gouq le gyoengq vunzbiengz. Vih docih bouxyinghyungz, mbanj Duncguz ranzranz cungj siengj cingj boux-

yinghyungz bae ndaw ranz bonjfaenh gwn ngaiz, hoeng bouxyinghyungz haetlaeng couh yaek baema, mbouj ndaej ranzranz bae guh hek caez, baenzlawz guh ne? Seizneix, miz dah sau Duncguz ndeu siengj le aen cawjeiq ndei ndeu: Moix ranz guh geij yiengh byaek swheij guh ndaej ceiq ndei haenx, comz hwnjdaeuj baij daiz daengx mbanj vunz doxcaemh dakdaih bouxyinghyungz. Aenvih donq ngaiz neix comz gij ndei bak ranz, ndigah couh heuhguh “ngaiz bak ranz”. Daj seizhaenx hwnj, Dilingz Duncgai roeb miz hekgviq roxnaeuz miz saeh' angq vunz coengcug doxcomz seiz, cungj baij “ngaiz bak ranz”, cungj fungsug neix itcig cienz daengz seizneix.

Seizneix, “ngaiz bak ranz” gaenq baenz Dilingz Duncgai aen ciethieq ndeu, seizgan dingh youq moix bi liggaeuq ndwenloeg ngeihseiq youq henz giuzndojfwn “Giuzfuk” banh. Ngoenz neix, ndaw mbanj ranzranz cungj yungh gij dinfwngz ceiq ndei bonjfaenh loengh daiz byaek feih ndei ndeu, lij guh ceizndek, “hing haj cungj feih”, guhcaz, naengj “ngaiz ndaem hom”, dawz bae gwnz “ngaiz bak ranz” caeuq vunzmbanj bouxhek caemh gwn. Gij beixnuengx Duncguz youq baihrog guhhong haenx caemh cungj ganj dauqma doxcomz, lij cingj

gyoengq caencik baengzyoux caez daeuj gwn ngaiz dem. Daihgva caez dajcuengq siuyieng caeq Baeuq-gvangoeng gwnz “Giuzfuk”, mbaenj rumz dingh fwn yinz. Riengzlaeng vunzmbanj buenx gyoengq hek naengh youq henz daiz raezrangrang haenx, caemh gwn laeujhaeucid, baez daiz gingq laeuj, gwn “laeujgyauboi”, mwh gwn ngaiz lij miz “gyaeujgaeq soengq hawj hek”, “youzcaz daih hek”, “byaeksoemj laeujhaemz daih hek”, “gwn laeuj-baenqienq” daengj gvigawj geizheih haenx, angqyangz ndawde caemh roxlaex, gyukgyad ndawde yienh huzndei, nauhnauh yiedyied, angq-angq yangzyangz…… Vunz Duncguz miz cungj gangjap ndeu: “Gwn ngaiz bak ranz, lienz sim bak ranz, gyaep bak cungj sez, guhbaenz bak yiengh saeh”. “Ngaiz bak ranz” dwg ngoenzndei vunzmbanj doxcomz, caemh dwg cungj fuengsik youq-gaenq yaengdingh, doenggvaq caeuq hengzguh gvigawj nem iekdingh ndaw mbanj ndeu, lij dwg gizdieg gietdingh comzbanh saeh vunzlai daengx mbanj ndeu. Youq mwh gwn ngaiz, daihgva miz maz gangj maz, cunggez gaxgonq, maeuzveh daengzcog, gangj ok siengjap guhfap bonjfaenh, demcaenh daengx mbanj doxgiet.



▲ Byaekfeih miz byasoemj, cimz saek faemz rox feih.



▲ Gingq gwn “laeuj gyau boi”, cu doia hwnj beixnuengx.



▲ Eu hot fwen lanz roen, hek daengz laeujhaeux gingq.



▲ Gaeuvaiz boq yiengj haeng, coux vunzhek haeuj mbanj.